

濟源縣志卷十六

藝文四詩

漢

紫芝歌

四皓

莫莫高山深谷逶迤奕奕紫芝可以療饑唐虞世遠
吾將安歸駟馬高蓋其憂將大富貴之留人不如貧
賤而肆志

唐

明皇早登太行山中言志

清蹕度河陽凝笳上太行火龍明鳥道鐵騎繞羊腸

白霧埋陰壑丹霞助曉光
澗泉含宿凍山水帶餘霜
野老茅為屋樵人薜作裳
宣風問耆艾敦俗勸耕桑
涼德慙先哲徽猷慕昔皇
不因今展義何以冒垂堂
奉和聖製太行山中言志應制

張說

六龍鳴玉鑾九折步雲端
河絡南浮近山經北上難
羽儀映松雪戈甲帶春寒
百谷晨笳動千巖曉仗攢
皇心感韶節敷藻念人安
既立省方館復建禮神壇
扈蹕忝天老承榮忝夏官
長勤百年意思見一勝殘

前題

蘇頌

北山東入海馳道上連天
順動三光注登臨萬象懸

俛觀河內邑平指洛陽川
按蹕夷關險張旗亘井泉
曉巖中警柝春事下蒐田
德重周王問歌輕漢后傳
宸遊鋪令典睿思起芳年
願以封書奏廻鑾禪肅然

前題

張嘉貞

明發扈山巔飛龍高在天
山南平對輦山北遠通燕
瞻彼岡巒峻憑茲士馬妍
九圻行若砥萬谷輾如川
羅網開三面閭閻問百年
澤將春雪比文共曉星連
後后逢今聖登台謝曩賢
唯餘事君節不讓古人先

前題

張九齡

孟月攝提貞乘時我后征
晨嚴九折度暮戒六軍行

日御馳中道風師卷太清
戈鋌林表出組練雪間明
動植希皇豫高深奉睿情
陪遊七聖列望幸百神迎
氣色烟猶喜恩光草尚榮
之果稱萬歲今此復同聲

前題

苗晉卿

金吾戒道清羽騎動天聲
砥路方南絕重巖始北征
關樓前望遠河邑下觀平
喜氣迴輿衿祥風入旆輕
祝堯三老至會禹百神迎
月令農光急春蒐禮後行
仍親后土祭更理晉陽兵
不似勞車輒空留八駿名
王屋山第之側雜構小亭
暇日與群公同遊

李 嶠

桂亭依絕巘蘭榭俯回溪綺棟魚鱗出雕甍鳳羽棲
引泉聊漲沼鑿登且通蹊席上山花落簾前野樹低
弋林開曙景釣渚發晴霓狎水驚梁雁臨風聽楚鷄
復看題柳葉彌喜蔭桐圭

答宋之問

司馬承貞

時既暮兮節欲春山林寂兮懷幽人登竒峰兮望白
雲帳綿邈兮象欲紛白雲悠悠去不返寒風颼颼吹
日晚不見其人誰與言歸坐彈琴思逾遠

行次田家溟梁作

儲光義

田家俯長道邀我避炎氛當暑日方晝方天無片雲

桑間禾黍氣柳下牛羊羣野雀棲空屋晨風不復聞
前登淚梁坂極望溫泉分逆旅方三舍西山猶未曛
玉真公主山居

山北天泉苑山西鳳女家不言沁園好獨隱武陵花
玉真公主山居

王維

碧落烟嵐外瑤臺道路賒如何連帝苑別自有仙家
此地回鑿駕緣谿轉翠華洞中開日月窻裏發雲霞
庭養冲天鶴溪流上漢槎種田生白玉泥竈化丹砂
谷靜泉逾響山深日易斜御羹和石髓香飯進胡麻
六道今無外長生詎有涯還瞻九霄上來往五雲車

送張道士歸王屋

先生何處去王屋訪茅君別婦留丹訣驅鷄入白雲
人間苦難住天上復離羣當作遼城鶴仙歌使爾聞
南池夜宿憶王屋青蘿舊齋

岑參

池上卧煩暑不櫛復不巾有時清風來自謂羲皇人
天晴雲歸盡雨洗月色新公事常不閑道書日生塵
早年家王屋五別青蘿春安得還舊山東谿垂釣綸
宿東谿王屋李隱者

山居不鑿井百家同一泉晚來南村黑雨色和人烟
霜畦吐寒菜沙雁噪河田隱者不可見天壇飛鳥邊

濟水縣志 卷十六
送胡象落第歸王屋別業

看君尚年少不第莫悽然可即疲獻賦山邛歸種田
野花迎短褐河柳拂長鞭置酒聊相送青門一醉眠
與諸公遊濟瀆泛舟

李頎

濟水出王屋其源來不窮泱泉數眼沸平地流清通
皇帝崇祀典詔書視三公分官禱靈廟奠璧沉河宮
神應每如答松篁氣慈龍蒼螭送飛雨赤鯉噴回風
酌酒布瑤席吹簫下玉童元冥掌陰事祝史告年豐
百谷趨潭底三光懸鏡中淺深露沙石蘋藻生虛空
晚景臨流美亭臯輕靄紅青山傍舟楫白鷺驚絲桐

我本家潁北出門見維嵩焉知崧峰外又有天壇東
左手正接羅浩歌眄青穹夷猶傲清吏偃仰狎漁翁
對此川上閑非君與誰同霜凝遠村渚月爭蒹葭叢
茲境信難遇為歡殊未終淹留悵言別煙嶼夕微濛

送王屋山人魏萬還王屋

李白

見王屋山魏萬云自嵩歷充遊梁入吳計程三千
里相訪不遇因下江東尋諸名山往復百越後于
廣陵一面遂乘興共過金陵美此公愛竒好古獨
往物表因述其行李遂有此贈

仙人東方生浩蕩弄雲海沛然乘天遊獨徃失所在

魏侯繼大名本家聊攝城卷舒入元化跡與古賢并
十三弄文史揮筆如振綺辦折田巴生心齊魯連子
西涉清洛源頗驚人世喧採秀卧王屋因窺洞天門
竭來遊嵩峯羽客何雙雙朝攜月光子暮宿玉女窗
鬼谷上窈窕龍潭下奔淥東浮汴河水訪我三千里
逸興滿吳雲飄飄浙江汜揮手杭越間樟亭望潮還
壽捲海門石雪橫天際山白馬走素車雷奔駭心顏
遙聞會稽美且度耶溪水萬輕輿千巖崢嶸鏡湖裏
秀色不可名清輝滿江城人遊月邊去舟在空中行
此中久延佇入剡尋王許笑讀曹娥碑沉吟黃絹語

天台連四明日入向國清五峰轉月色百里行松聲
靈溪恣沿越華頂殊超忽石梁橫青天側足履半月
蒼然思永嘉不憚海路賒掛席歷海嶠廻瞻赤城霞
赤城漸微沒孤嶼前曉兀水續萬古流亭空千霜月
縉雲川谷難石門最可觀瀑布掛北斗莫窮此水端
噴壁洒素雪空濛生晝寒却思惡溪去寧懼惡溪惡
咆哮七十灘水石相噴薄路創李北海巖開謝康樂
松風和猿聲搜索連洞壑徑出梅花橋雙溪納歸潮
落帆金華岸赤松若可招沈約八詠樓城西孤岩堯
嵒堯四荒外曠望群川會雲卷天地開波連浙西大

亂流新安口北指嚴光瀨釣臺碧雲中邈與蒼梧對
稍稍來吳都徘徊上姑蘇煙綿橫九疑潏蕩見五湖
目擊心更遠悲歌但長吁迴橈楚江濱揮策楊子津
自著日本裘昂藏出風塵五月造我語知非僿疑人
相逢樂無限水石日在眼徒干五諸侯不致百金產
吾友楊子雲絃歌播清芬雖為江寧宰好與山公群
乘興但一行且知我愛君君來幾何時仙臺應有期
東牕綠玉樹定長三五枝至今天壇人當笑爾歸遲
我苦惜遠別茫然使心悲黃河若不斷白首長相思

寄王屋山人孟大融

我昔東海上勞山食紫霞親見安期公食棗大如瓜
中年謁漢主不愜還歸家朱顏謝春暉白髮見生涯
所期就金液飛步登雲車願隨夫子天壇上閑與仙
人掃落花

玉真仙人詞

玉真之仙人時往太華峯清晨鳴天鼓颺欸騰雙龍
弄電不輟手行雲本無蹤幾時入少室王母應相逢

昔遊

杜甫

昔謁華蓋君綠袍崑玉脚人棺已上天白日亦寂寞
暮升艮岑頂巾几猶未却弟子四五人入來淚俱落

余時遊名山發輒在遠窳良覲違夙願含凄向寥廓
林昏罷幽磬竟夜伏石閣王喬下天壇微月映皓鶴
晨溪向虛駛歸徑行已昨豈辭青鞋胝悵望金七藥
東蒙赴舊隱尚憶同志樂伏事董先生于今獨蕭索
胡為客關塞道意久衰薄妻子亦何人丹砂負前諾
雖悲髮鬢變未憂筋力弱杖藜望清秋有興入廬霍

憶昔行

憶昔北尋小有洞洪河怒濤過輕舸辛勤不見華蓋
君艮岑青輝慘么麼千崖無人萬壑靜三步回頭五
步坐秋山眼冷魂未歸仙賞心違淚交墮弟子誰依

白茅室廬老獨啟青銅鎖巾拂香餘搗藥塵階除灰
死燒丹火元圃滄洲莽空濶金節羽衣飄婀娜落日
初霞閃餘映倏忽東西無不可松風澗水聲合時青
兕黃熊啼向我徒然咨嗟撫遺跡至今夢想仍猶左
秘訣隱文湏內教晚歲何功使願果更訪衡陽董鍊
師南遊早鼓瀟湘柁

題王真觀

韓翃

白雲斜日映春松玉宇瑤壇知幾重把酒題詩人散
後華陽洞裏有疎鐘

題王真觀公主山池院

司空曙

香殿留遺影春朝玉戶開羽衣重素几珠網儼輕埃
石自蓬山得泉經大液來柳絲遮綠浪花粉落青苔
鏡掩鸞空在霞銷鳳不廻惟餘古桃樹傳是上仙栽

送王鍊師赴王屋洞

權德輿

稔歲在芝田歸程入洞天白雲辭上國青鳥會群仙
自以棋消日寧資藥駐年相看話離別風馭忽泠然

過玉真公主影殿

盧綸

夕照臨窻起暗塵青松繞殿不知春君看白髮誦經
者半是宮中歌舞人

登天壇夜見海日

李益

朝浮碧峯三十六夜上天壇月邊宿仙人攜我奉玉
英壇上夜半東方明仙鐘撞徹迎海日海中離離三
山出霞梯赤城遙可分霓旌絳節依彤雲八鸞五鳳
紛在御王母欲上朝元君群仙指此為我說幾見塵
飛滄海竭竦身別我期丹宮空山處處遺清風九州
下視杳未旦一半浮生皆夢中始知武皇求不死去
逐瀛州羨門子

客有為予話天壇遇雨之狀因以賦之

劉禹錫

清晨登天壇半路逢陰晦疾行穿雨過却立視雲背